



清刻龍藏佛說法變相圖

六經同卷

佛說造塔功德經

佛說不增不減經

佛說堅固女經

佛說大乘流轉諸有經

佛說大意經卷九

受持七佛名號所生功德經

造塔功德經序

翻經沙門釋圓測撰

夫塔者梵之稱譯者謂之墳或方或圓厥製多緒乍琢乍璞文質異宜並以封樹遺靈局鈴法藏冀表河砂之德庶酬塵劫之勞豈伊

弓劍衣冠言申永慕禹陵孔壁用顯緘藏而
已哉將有量等大千覆三界而高梵世取均
菴果偶棗葉而譬針鋒洪纖兩途福應無二
大小千計淨心終一何只黃金白玉架迥爭
暉火齊水精浮空競彩夕震祥飄之響入鏤
鐸以流清晨霏仙露之甘上彫盤以凝泣至
乃位隆三果勲重四禪高升有頂之宮行屆
無災之地斯教之弘旨也此經以永隆元年
冬十一月十五日請天竺法師地婆訶羅此言
日與西明寺沙門圓測等五人於弘福道場

奉詔宣譯至其年十二月八日終其文義庶
斯法寶周給大千俾彼慧燈照融三界云爾

佛說造塔功德經

唐中天竺三藏法師 地婆訶羅奉 勅譯

如是我聞一時佛在忉利天宮白玉座上與大比丘大菩薩等及彼天主無量衆俱時大梵天王那羅延天大自在天及五乾闥婆王等各與眷屬俱來至佛所欲問如來造塔之法及塔所生功德之量會中有菩薩名觀世音知其意即從座起偏袒右肩右膝著地合掌向佛而作是言世尊今此諸天乾闥婆等故來至此欲請如來造塔之法及塔所生功德之量惟願世尊爲彼解說利益一切無量衆生爾時世尊告觀世音菩薩言善男子若此現在諸天衆等及未來世一切衆生隨所在方未有塔處能於其中建立之者其狀高妙出過三界乃至至小如菴羅果所有表刹上至梵天乃至至小猶如針等所有輪蓋覆彼大千乃至至小猶如棗葉於彼塔內藏掩

如來所有舍利髮牙鬚爪下至一分或置如來所有法藏十二部經下下至於一四句偈其人功德如彼梵天命終之後生於梵世於彼壽盡生五淨居與彼諸天等無有異善男子如我所說如是之事是彼塔量功德因緣汝諸天等應當修學爾時觀世音菩薩復白佛言世尊如向所說安置舍利及以法藏我已受持不審如來四句之義惟願爲我分別演說爾時世尊說是偈言

諸法因緣生 我說是因緣 因緣盡故滅

我作如是說

善男子如是偈義名佛法身汝當書寫置彼塔內何以故一切因緣及所生法性空寂故是故我說名爲法身若有衆生解了如是因緣之義當知是人即爲見佛爾時觀世音菩薩及彼諸天一切大衆乾闥婆等聞佛所說皆大歡喜信受奉行

佛說造塔功德經